

nun ce serveno, si 'a capa d''a gente fosse meno fattemieje... forse pure ll'Italia fosse cuntenta 'e fà 'a gara cu 'o Costarica p''a "Carbon-neutral World Cup" mmece 'e se fà 'o core tanto pe ll'eliminazziona 'e ll'Inter ca è sulo furastiere.

'E n'Italia accusi jesse fiero pur'je!

~~~ 0 ~~~0 ~~~

## A Leopardi 'o Premio Nobel p''a pace

19 marzo 2008



Stammatina m'aggio pigliato quacche minuto pe chattà cu n'amica d''a Lituania. Na guagliuna giovane, capace e preparata, sicuro una d''e megliere perzone ca aggio ncuntrato sti urdeme anne.

Oilloco na parte 'e chillo ca nc'avimmo ditto.

**je** - che pienze d''o BIPPIblog?

**essa** - me piace, sule ca sti cose me fanno overo paura

**je** - paura?

**essa** - mhm

nun sapesse propio comme putesse aiutà pe cagnà quaccosa è comme avé ll'uocchie nzerrate nc'adda stà n'ata maniera 'e fà quaccosa ca va buono p''a gente semprice comm'a me

**je** - 'a cosa cchiù nicissaria, chest'è pe tutte quante, è cagna nuje stesse dint'â capa nosta nzerrà ll'uocchie nunn'è 'a strada bona si ognuno 'e nuje cagnasse pure sule nu poco, 'o munno fosse nu puosto assaje meglio

**essa** - 'o saccio, ma a stà assettata dinto a na bella casa chiena 'e cummudità e dicere ca stongo 'mpenziere pe chello ca veco 'e succedere è comm'a tenè ll'uocchie nzerrate

Veco sta maniera 'e fà nu poco pe tutte parte. 'E **guagliune se senteno piccerille, comme si nun fosseno**

**capace 'e se mettere mmiezo è questione grosse d''o munno** ca è na giungla malamente e senza legge e tanno meglio a s'accupà 'e cose cchiù vicine e facile, 'e sport, d''o cellulare e d''o Grande Fratello. **Pure 'a democrazzia, ca è attivismo e partecipazziona, addiventa sulamente espressione 'e voto senza coscienza e senza genio**, e so' cuntente chill'uommene assaje mpurtante ca nun teneno niente 'a dicere.

Pecché **a se ribbellà nun serve a niente e niente cagnarrà**, meglio a campà senza penziere cu ll'uocchie nzerrate, comme diceno 'e **Giacomo Leopardi** quann'era giuvinotto. Leopardi, nce mparano â scola, è nu **pessimista appucundruto** e picciò tutte 'e guagliune 'o teneno ncanna.

Mmece Leopardi, 'o signor Leopardi, a 38 anne, poco primma 'e muri e chino 'e coscienza, capette ca **'a società er'a essere fatta nova e cchiù solidale, no cu lezione astratte 'e morale o religione, ma pecché nc'amma fà capace ca sule 'a resistenza tutte nzieme contr'ò nemico naturale, 'o male, pò fà ll'uommene overamente uommene**, e fà 'a vita na cosa chiena 'e dignità.

Stu Leopardi, 'o signor Leopardi, 'o vestesse cu 'o 'mbrellino 'e BIPPI p''o vedè annanze a tutto a dicere no â guerra, ô sopruso, è cose fatte a camorra, â violenza, è turture, a ll'ingiustizia, â xenofobia, a ll'assimilazziona a forza d''e culture cchiù piccerelle, â distruzziona d''a natura, no è buscie, è paure telecomandate, è besuogne a forza, â gnurantià d''e guverne. Stu Leopardi venesse cu me a fà 'o burdello contr'è megapruggette ca fanno sulo ruvine, contr'a ll'accupazzione militare, contr'è caste governative, contr'è disfunzione fattapposta. Stu Leopardi fosse n'attivista p''a pace 'e chilli guosse.

**Addimanno pe Leopardi 'o premio Nobel p''a pace, â memoria!**

~~~ 0 ~~~0 ~~~

Meraglia 'e scuncierto ô valore militare

21 marzo 2008

Chi s'arricorda 'e **Franco Piperno** e 'e **Potere Operaio** ('E faticature ô guverno)? Chi s'arricorda 'e ll'anne '70 in Italia, quanno magistrature, guardie e gente d''a puliteca mureveno accise

sott'è mazzate date 'a filosofe, rivoluzionarie e peones d''a lotta armata? 'E primme 'e chiammajemo **"serviture d''o Stato"**. 'E siconde 'e chiammajemo **"terroriste"**.

Fuje na guerra piccerella e 'o Stato 'a vincette e 'a scrivette ncopp'è libbre ca nuje oggi leggimmo.

Nun vulesse ca quaccheduno mmiezo 'e 5 ca me leggeno pensa ca je dongo raggione ô terrorismo. Mmece je sto d''a capa ô pede cu 'o principio scritto dint'a chillo bello articolo 11 d''a Costituzione Italiana: "Ll'Italia schifa 'a guerra comme maniera pe fà purcarie contr'â libbertà 'e ll'ata gente e comme strumento p'arresolvere 'e cunflitte internazzionale".

Me metto 'a coppa, pe me è fatto buono sulo a mità, je 'o cagnasse mommò cu : **"O popolo italiano schifa 'e tutte 'e manere violenza e sfreggie comme strumento pe mettere mano a tutte 'e tarantelle, comme so' so"**, senza 'e nce parlà 'a coppa!

Franco Piperno, ntervistato d''a televisione, ha ditto: "A morale tene tanti facce. **Nce stanno perzone ca vanno a jittà bombe ncopp'a na città, e so' annunenate grand'uommene, e perzone ca spareno ncopp'a nu bersaglio prciso, e songo annunenate criminale.** 'A siconda, sulo pecché chill'ate hanno perzo 'a 'guerra'".

Quacche giornalista s'ha fatto na risata ncopp'a sti parole.

Enrico Cialdini fuje nu grand'ommo 'e ll'indipendenza italiana. Ô mumento ca se faceva 'a guerra contr'è brigante, isse fuje spunsabbele 'e punizione *addò cojo cojo* e esecuzione 'e massa 'e pupulazzione sane sane ô sud Italia. Ma sti cose so' scumparute d''a storia.

William Tecumseh Sherman fuje nu grand'ommo d''a guerra 'e secessiona americana. Ô mumento ca se faceva 'a guerra contra ll'indiane fuje spunsabbele 'e punizione *addò cojo cojo* e esecuzione 'e massa 'e pupulazzione sane sane mmiez'è pianure americane. Ma sti cose so' scumparute d''a storia.

Gengis Khan, Napulione e Cesare fujeno grand'uommene o assassine? 'E 'E quanta muorte nnucente fujeno spunsabbele Stalin e Mao, Roosevelt e Churchill? **'E capibanda ca stanno oggi**, ll'alliate mpurtante e 'e nemice d''o tiempo nuosto, **so' grand'uommene o assassine?** P''o sapè avimmo sulo a aspettà ca uno vence e n'ato perde. Chillo ca vence scrivarrà 'a storia e nc'ò diciarrà.

This document was created with Win2PDF available at <http://www.win2pdf.com>.
The unregistered version of Win2PDF is for evaluation or non-commercial use only.
This page will not be added after purchasing Win2PDF.